

# ԱԶԴԱՐԱՐ

ՏԵՂԵԿԱՏՈՒ ԱՌԱՋՆՈՐԴԱՐԱՆԻ ՀԱՅՈՑ ՔՈՒԵՅԹԻ ԵՒ ՇՐՋԱԿԱՅԻՑ ՀԱՅՈՑ ԹԵՄԻՆ

P.O.Box: 8157, Salmiyeh 22052- Kuwait. Tel: 965-25614392, Fax: 965-25638312, e-mail: [prelacy@armenianprelacykw.org](mailto:prelacy@armenianprelacykw.org)

*ՆՈՐ ՇՐՋԱՆ, ԺԱ. Տարի, Թիւ 474, Ուրբաթ, 01 ՓԵՏՐՈՒԱՐ, 2019*

*ՀԱՅԿԱԿԱՆ*

## Հայաստանի Կառավարութեան Անդամները Տուին Իրենց Երդումը

Հայաստանի Հանրապետութեան նախագահական նստավայրին մէջ, նախագահ Արմէն Սարգսեանի ներկայութեամբ, 30 Յունուարին տեղի ունեցաւ Հայաստանի Հանրապետութեան կառավարութեան անդամներու երդման արարողութիւնը: Այս մասին կը հաղորդէ հանրապետութեան նախագահի գրասենեակը:

Առաջինը ամպիոնին մօտեցաւ Հայաստանի Հանրապետութեան վարչապետ Նիկոլ Փաշինեան՝



ընթերցելով երդման արձանագրութիւնը.

«Յանուն համազգային նպատակներու իրականացման եւ հայրենիքի հզօրացման՝ կ'երդնում բարեխղճօրէն կատարել ժողովուրդին առջեւ ունեցած պարտաւորութիւններս, պահպանել Հայաստանի Հանրապետութեան Սահմանադրութիւնը եւ օրէնքները, նպաստել Հայաստանի Հանրապետութեան ինքնիշխանութեան եւ շահերու պահպանման, հաւատարիմ մնալ կառավարութեան անդամի բարձր կոչումին»:

Այնուհետեւ, հերթով երդուեցան կառավարութեան 12 անդամները:

Երդման արարողութեան աւարտին՝ նախագահ Արմէն Սարգսեան շնորհաւորեց վարչապետն ու կառավարութեան անդամները՝ մաղթելով անոնց յաջողութիւն եւ արդիւնաւէտ աշխատանք՝ ի շահ Հայաստանի հզօրացման եւ ի բարօրութիւն հայ ժողովուրդին:

## **Վարչապետ Փաշինեան. «Մենք Չենք Կրնար Նոյնիսկ Քննարկել «Տարածքներ Խաղաղութեան Դիմաց» Բանաձեւը**

Ազրպէյճանի նախագահ Իլհամ Ալիեւի հետ հանդիպումները բանակցութիւններ չեն, անոնք ոչ պաշտօնական շփումներ են, որոնց ընթացքին ուղղակի տեղի կ'ունենայ մտքերու փոխանակում: Ըստ «Արմէնփրես»-ի՝ այս մասին, 30 Յունուարին, լրագրողներու հետ ունեցած զրոյցի մը ընթացքին ըսած է Հայաստանի Հանրապետութեան վարչապետ Նիկոլ Փաշինեան:



Պատասխանելով լրագրողի մը այն հարցադրման, թէ վերջերս սկսած է շրջանառուիլ այսպէս կոչուած «տարածքներ խաղաղութեան դիմաց» թեզը, Հայաստանի վարչապետը նշած է. «Մենք ընդհանրապէս չենք կրնար նոյնիսկ քննարկել «տարածքներ խաղաղութեան դիմաց» բանաձեւը»:

Փաշինեան նկատած է, որ ներկայ կառավարութիւնը Լեռնային Ղարաբաղի տագնապի խաղաղ լուծման հարցով կը վարէ քաղաքականութիւն մը, որ նախապէս ոչ մէկ կառավարութիւն վարած է:

«Որեւէ զուգահեռ տանիլը եւ նախապէս վարած քաղաքականութեան հետ ընդհանրութիւն գտնելու փորձերը կատարեալ մոլորութիւններ են», վստահեցուցած է Փաշինեան:

Անդրադառնալով հարցին, թէ արդեօք ԵԱՀԿ-ի Մինսքի խմբակի համանախագահող երկիրներուն կողմէ բանակցութիւնները վերսկսելու ու նոր թափ հաղորդելու նախաձեռնութիւն կա՞յ, Փաշինեան ըսած է. «Այս հարցը կը գտնուի արտաքին գործոց նախարարներու քննարկման օրակարգին վրայ»:

## **Պոլլընը Եւ Ալիեւը Քննարկած Են Լեռնային Ղարաբաղի Տագնապի Խաղաղ Լուծման Հեռանկարները**

Միացեալ Նահանգներու նախագահի ազգային անվտանգութեան հարցերով խորհրդական Ճոն Պոլլըն եւ Ազրպէյճանի նախագահ Իլհամ Ալիեւը նախանցեալ օր քննարկած են երկկողմանի յարաբերութիւնները եւ Լեռնային Ղարաբաղի տագնապի խաղաղ լուծման հեռանկարները, կը յայտնէ «ՌԻԱ Նովոսթի»-ն:

«Այսօր ես խօսած եմ Ազրպէյճանի նախագահ Ալիեւին հետ: Մենք քննարկած ենք շարք մը ընդհանուր հետաքրքրութիւն ունեցող հարցեր, որոնց կարգին՝ ուժանիւթի անվտանգութիւնը, անվտանգութեան մարզին մէջ համագործակցութիւնը եւ Լեռնային Ղարաբաղի տագնապի

խաղաղ լուծման հուլովոյթին Միացեալ Նահանգներու աջակցութիւնը», գրած է Պոլլթըն իր թուիթթըրեան էջին վրայ:

## **Արցախեան Ազատամարտին Մասնակից Ջաւախահայ Նահատակի Մը Կիսանդրիին Բացումը՝ Վրաստան – Ազրպէյճան Լարուածութեան Պատճառ**

Ախալքալաքի մէջ 20 Յունուարին տեղի ունեցած է Արցախի պատերազմին ընթացքին գոհուած Միքայէլ Աւագեանի կիսանդրիի բացումը՝ ներկայութեամբ Ախալքալաքի քաղաքապետին, Սամցխէ-Ջաւախքէն Վրաստանի խորհրդարանի հայ պատգամաւորներուն, Վրաստանի մէջ Հայաստանի դեսպանին:



Յաջորդ օրերուն Պաքուն բողոքի պաշտօնական նամակ յղած է Վրաստանի արտաքին գործոց նախարարութեան՝ պահանջելով ձեռնարկել այս նախաձեռնութիւնը չեղեալ նկատելու քայլերու: Վրաստանի արտաքին գործոց նախարարութիւնը տուած է դիւանագիտօրէն հասկնալի պատասխան՝ կոչ ուղղելով տուեալ նիւթին շուրջ իրարանցում չստեղծելու: Այդ մերժողական եւ զսպուածութիւն ցուցաբերելու յորդոր պարունակող պատասխանը պաշտօնական Պաքուն մղած է ջղագրգռութեան:

Արդարեւ, ազրպէյճանական կողմը ո՛չ միայն չէ անսացած Վրաստանի յորդորին, այլեւ քարոզչական-տեղեկատուական աւելի մեծ արշաւի ձեռնարկած է՝ ներգրաւելով թէ՛ մասնագէտներ, եւ թէ՛ քաղաքական գործիչներ, որոնք տազնապի ահագանգ կը հնչեցնեն, թէ՛ վտանգուած է Թուրքիա-Ազրպէյճան ռազմավարական հաղորդակցութիւնը, քանի որ ջաւախահայութիւնը կրնայ խաթարել շրջանով անցնող հաղորդակցութիւններու բնականոն գործունէութիւնը: Պաքուն կը փորձէ այդ արշաւին մասնակից դարձնել նաեւ վրացական որոշ շրջանակներ, սակայն այդքան ալ չի յաջողիր:

Միքայէլ Աւագեանի կիսանդրիի բացման առիթը, այսպիսով, Ազրպէյճան կը փորձէ օգտագործել՝ բացայայտ սպառնալիքներ հնչեցնելով Վրաստանի հասցէին: Հաւանական կը նկատուի, որ այս հարցը շարունակուի:

## 2019 թ. Յունուարի 16-24-ը Ստեփանակերտում կայացած ՀՅԴ 33-րդ Ընդհանուր Ժողովը արձանագրելով, որ՝

-Անցնող քառամեակում կուսակցությունը, հարազատ մնալով իր ռազմավարական սկզբունքներին, մշտապես գործունեության առանցքում է պահել հայ ժողովրդի իրաւունքների պաշտպանութեան, Հայաստանի պետականութեան ամրապնդման, երկրի կայունութեան եւ անվտանգութեան հարցերը.

-Վերահաստատում է Արցախի հիմնահարցի վերաբերեալ նախապէս յայտարարուած դիրքորոշումները.

-Հայկական աշխարհը, իր բաղադրիչ մասերով՝ Հայրենիք եւ Սփիւռք, որպէս մէկ միասնական ամբողջութիւն, այն ուժն է, որը կարող է մրցակցային առաւելութիւններ ապահովել ժամանակակից աշխարհում.

-Ապրիլեան համաժողովրդական շարժման արդիւնքում ապագայի նկատմամբ ոգեւորութեան եւ յոյսի նոր ալիք է բարձրացել, որի ճիշդ հունաւորումը կարող է ապահովել Հայաստանի եւ հայութեան յետագայ առաջընթացը.

-Առաջիկայ ժամանակահատուածում ՀՅ Դաշնակցութիւնը գործելու է ներքաղաքական եւ արագ փոփոխուող աշխարհաքաղաքական նոր իրողութիւնների պայմաններում.

-Հայկական Սփիւռքի կազմակերպման եւ զարգացման գործը շարունակում է մնալ ՀՅԴ համահայկական ռազմավարութեան էական բաղադրիչներից մէկը.

-ՀՅԴ-ն հաւատարիմ է հայութեան Պահանջատիրութեանն ու անժամանցելի իրաւունքների վերականգնմանը.

### Յայտարարում է՝

Իբրեւ արտախորհրդարանական քաղաքական ուժ, ազգային ուղեգծին ու ընկերվարական իր գաղափարախօսութեանը հաւատարիմ, Դաշնակցութիւնը շարունակելու է իր մշտանորոգ ընթացքը, նպատակ ունենալով կերտել ազատութեան, արդարութեան եւ համերաշխութեան հիմնարար սկզբունքների վրայ հիմնուած իրաւական, ժողովրդավարական եւ սոցիալական պետութիւն:

-Հաւատարիմ է մնալու «զարգանալ՝ չզիջելով» սկզբունքին, թոյլ չտալով որեւէ շեղում ազգային ուղեգծից ու նպատակադրումներից.

-կողմնակից է Հայաստանի բազմաբեւեռ, փոխլրացնող արտաքին քաղաքականութեանը.

-որակական նոր թափ է հաղորդելու Հայ դատի պայքարին.

-շարունակելու է աջակցել ջաւախահայութեան իրաւունքների պաշտպանութեանը.

-վճռականօրէն հակազդելու է ներազգային պառակտումների ցանկացած փորձի.

-հանդէս է գալու հայութեան ազգային, հոգեւոր հաստատութիւնների եւ արժեքների պաշտպանութեան յանձնառութեամբ.

-խրախուսելու է տարբեր հարթակներում կանանց առաւել շօշափելի ներկայութիւնը:

Առ այդ, Հայ յեղափոխական դաշնակցութիւնը կոչ է ուղղում աշխարհասփիւռ իր շարքերին, համակիրներին եւ ուղեկից կառոյցներին՝ համախմբուելու հայութեան ու Մայր հայրենիքի կենսական շահերի շուրջ՝ յանուն Ազատ, Անկախ եւ Միացեալ Հայաստանի կերտման:

ՀՅԴ 33-րդ Ընդհանուր Ժողով  
Արցախ, Ստեփանակերտ  
25.01.2019

**ՄԻՋԱԶԳԱՅԻՆ**

**Ըստ Մատուրոյի. Թրամփի Քոլումպիոյ Կառավարութեան  
Հրամայած Է Ահաբեկել Չինք**

Նիքոլաս Մատուրո հակադարձեց արտակարգ ընտրութիւններ կատարելու եւրոպական կոչերուն՝ յայտնելով, որ ընտրութիւնը կատարուեցաւ, եւ եթէ կայսերապաշտները նոր ընտրութիւն կ'ուզեն, ապա պէտք է սպասեն մինչեւ 2025:



Մատուրո «Սփութնիք» լրատու գործակալութեան հետ հարցազրոյցի ընթացքին Միացեալ Նահանգներու նախագահ Տանըլտ Թրամփը ամբաստանեց Քոլումպիոյ կառավարութեան եւ մաֆիային զինք ահաբեկելու հրաման տուած ըլլալու յանցանքով՝ նշելով, որ եթէ ինք սպաննուի, ապա պատասխանատուները այդ երկու երկիրներն են:

Ան պատրաստակամութիւն յայտնեց Թրամփի հետ հանդիպելու Միացեալ Նահանգներու մէջ, Վենեզուելայի մէջ կամ անոր ուզած որեւէ մէկ այլ տեղ, սակայն աւելցուց, որ ատիկա պիտի չիրականանայ ներկայ կացութեան մէջ, որովհետեւ իր շրջապատը այդպիսի հանդիպում պիտի չարտօնէ:

Ան Միացեալ Նահանգներու ժողովուրդին յղուած պատգամով մը ըսաւ, թէ Թրամփի Վենեզուելայի մէջ յեղաշրջում կազմակերպած է՝ աւելցնելով. «Պէտք չէ արտօնէք, որ Ամերիկայի մէջ երկրորդ Վիեթնամ մը ըլլայ»:

«Եթէ ինձի բան պատահի, ապա պատասխանատուները Թրամփին ու Քոլումպիոյ նախագահին են», ըսաւ ան:

Միւս կողմէ, Վենեզուելայի գերագոյն դատարանը ընդդիմադիր ղեկավար Խուան Կուայտոյին արգիլեց երկրէն հեռանալ եւ սառեցուց անոր դրամատնային հաշիւները: Սակայն Մատուրո նշեց, որ առայժմ Կուայտոն ձերբակալելու որոշում չկայ:

**«Մենք Գրեթէ Կանգնած Ենք ՕԹԱՆ-ի Դռներուն  
Մօտ, Որոնք Պէտք Է Բացուին» Կ'ըսէ Վրաստանի  
Նախագահը**

Վրաստանը այսօրուան դրութեամբ բոլորէն աւելի պատրաստ է ՕԹԱՆ-ի անդամակցութեան՝ բոլոր չափանիշներով, որոնք կը պահանջուին անդամակցութեան համար: Վրացական «Ափսնի»



կայքը կը հաղորդէ, որ այս մասին մամլոյ ասուլիսի ընթացքին յայտարարած է Վրաստանի նախագահ Սալոմէ Զուրապիշվիլի:

«Մենք գրեթէ կանգնած ենք ՕԹԱՆ-ի դռներուն մօտ, որոնք պէտք է բացուին: Սակայն տակաւին քաղաքական կացութիւնը այնպիսին է, որ մենք այս փուլին երեւի չստանանք ՄԱՓ-ը (ՕԹԱՆ-ի անդամակցութեան գործողութիւններու ծրագիրը), սակայն այդ պահանջը մենք պէտք է միշտ դնենք», ըսած է ան:



Ըստ Վրաստանի նախագահին, կարելի չէ ժամանակը սպասումներու վրայ մսխել: «Մեզի աւելի ՕԹԱՆ անհրաժեշտ է, աւելի անվտանգութիւն, աւելի համագործակցութիւն, եւ ՕԹԱՆ-ը պատրաստ է աստոր», յայտնած է Զուրապիշվիլի՝ գնահատելով իր Պրիւքսել կատարած այցելութեան արդիւնքները:

## Քրեմլին Կը Զգուշացնէ Վենեզուելայի Մէջ Ամերիկեան Զինուորական Միջամտութեան Մը Շատ Ժխտական Հետեւանքներէն

Քրեմլին յայտարարեց, թէ Վենեզուելայի քարիւղի ազգային ընկերութեան դէմ հաստատուած ամերիկեան պատժամիջոցները ապօրինի են՝ ակեցնելով, որ Ռուսիան Վենեզուելայի քարիւղի ընկերութեան դէմ ամերիկեան պատժամիջոցներուն պատճառով իրեն կրելիք վնասներուն գնահատականը կը կատարէ:



Քրեմլին նաեւ զգուշացուց Վենեզուելայի մէջ ամերիկեան զինուորական միջամտութեան մը շատ ժխտական հետեւանքներէն:

«Զգարմացանք հաղորդակցութենէն՝ Թրամփի եւ ընդդիմութեան ղեկավար Խուան Կուայտոյի միջեւ, որ ինքզինք Վենեզուելայի նախագահ հոչակելէ առաջ Ուաշինկթընի հետ կապի մէջ էր», նշեց Քրեմլին:

Ռուսիոյ արտաքին գործոց նախարար Սերկէյ Լաւրով իր կարգին Միացեալ Նահանգները ամբաստանեց Վենեզուելայի նկատմամբ վարմունքին մէջ միջազգային օրէնքը խախտելու եւ այդտեղ տիրող կացութիւնը հանդարտեցնելու միջազգային ջանքերը խանգարելու մէջ:

«Վենեզուելայի դեմ ամերիկեան պատժամիջոցները ապօրինի են եւ անօրինական», նշեց ան՝ աւելցնելով, որ Ուաշինկթընն ու անոր դաշնակիցները իրականութեան մէջ կը փորձեն Վենեզուելայի դրամները գրաւել:

Ռուսական դիւանագիտութեան պետը յայտնեց, որ Վենեզուելայի քարիւղի ընկերութեան դեմ ամերիկեան պատժամիջոցները կրնան տոլարին նկատմամբ վստահութեան վնասել եւ Վենեզուելայի մէջ կացութիւնը վատթարացնել:

«Նախագահ Նիքոլաս Մատուրոյին աջակցելու անհրաժեշտ բոլոր քայլերը պիտի որդեգրենք», ըսաւ Լաւրով: Միւս կողմէ, «Ուաշինկթըն Փոսթ» հաղորդեց, որ Միացեալ Նահանգներու ազգային անվտանգութեան հարցերով խորհրդատու Ճոն Պոլթըն Մայիտակ տան մէջ Վենեզուելայի դեմ պատժամիջոցները յայտարարելու մամլոյ ասուլիսի ընթացքին իր առջեւ ունէր դեղին թուղթ մը, որուն վրայ գրուած էր երկու նախադասութիւն՝ «Աֆղանիստան, ողջո՛յն (Թալեպան շարժումի հետ) բանակցութիւններուն» եւ «5 հազար զինուորներ դէպի Քոլումպիա»:

## «Իրան Զի Ծրագրեր Իր Հրթիռներուն Հասողութիւնը Մեծցնել» Կ'ըսէ Շամխանի



Իրան մտադիր չէ մեծցնել իր հրթիռներուն հասողութիւնը, սակայն կը շարունակէ աշխատիլ անոնց ճշգրտութեան վրայ: Ռուսական ԹԱՍՍ լրատու գործակալութիւնը կը հաղորդէ, որ այս մասին յայտնած է Իրանի ազգային անվտանգութեան բարձրագոյն խորհուրդի քարտուղար Ալի Շամխանի:

«Իրանի համար ո՛չ գիտական, ո՛չ կազմակերպական խոչընդոտներ կան մարտական հրթիռներու հասողութիւնը մեծցնելու համար:

Սակայն Թեհրան մտադիր չէ ատիկա ընել», ըսած է Շամխանի:

«Իրանի պաշտպանական վարդապետութեան համաձայն, երկիրը մշտապէս կ'աշխատի մեծցնել հրթիռներու ճշգրտութիւնը», աւելցուցած է ան: «Ռոյթըրզ» լրատու գործակալութիւնը 25 Յունուարին՝ վկայակոչելով Ֆրանսայի արտաքին գործոց նախարար Ժան Իվ Լը Տրիանը, հաղորդած էր, որ Փարիզ պատրաստ է Թեհրանի դեմ հետագայ պատժամիջոցներ հաստատելու Իրանի հրթիռային ծրագիրին շուրջ բանակցութիւններուն մէջ յառաջընթացի բացակայութեան պարագային:

Իրանի արտաքին գործոց նախարարութեան բանբեր Պահրամ Ղասեմի 28 Յունուարին՝ պատասխանելով ֆրանսական դիւանագիտութեան պետին, յայտարարած էր, թէ հրթիռային ծրագիրը Թեհրանին անհրաժեշտ է սեփական անվտանգութիւնը ապահովելու համար եւ քննարկումներու առարկայ չէ:

## ԱԿՆԱԼԿ

### **Քրտական Խաղաթուղթը՝ Թուրքիոյ Խորհրդարանին Մէջ**

Թուրքիոյ մէջ կը շարունակուի Ժողովուրդներու ժողովրդավարական կուսակցութեան երեսփոխանները անձեռնմխելիութենէ զրկելու գործընթացը:

Յառաջիկային եւս 9 միջնորդութիւն կը ներկայացուի Թուրքիոյ խորհրդարանի սահմանադրական եւ արդարադատութեան միացեալ յանձնախումբին, որպէսզի քրտամէտ կուսակցութեան 8 երեսփոխաններ միանուազ զրկուին պատգամաւորական անձեռնմխելիութենէ:

Նախապէս նման միջնորդութիւն ներկայացուած էր Թուրքիոյ խորհրդարան՝ Ժողովուրդներու ժողովրդավարական կուսակցութեան հայ երեսփոխան Կարօ Փայլանի դէմ:

Այս կը նշանակէ, որ Ժողովուրդներու ժողովրդավարական կուսակցութեան գրեթէ ամբողջ խորհրդարանական խմբակցութեան դէմ խորհրդարանէ արտաքսումի վճիռ կը նախապատրաստուի:

Այս առաջադրանքը, որ Անգարան փուլ առ փուլ կը ջանայ կիրարկել, իբրեւ մտահոգութեան առանցք ունի անշուշտ քրտական քաղաքական գործօնի չէզոքացումը: Եթէ զինուորական գետնի վրայ չէզոքացման գործողութիւններ կը կատարուին սուրիական, իրաքեան եւ թրքական տարածքներու վրայ, ապա խորհրդարանին մէջ քրտական իրաւաքաղաքական ազդակի վերացման համագոր միջնորդութիւն է կատարուածը:

Անգարայի համար քրտական մղձաւանջը կը շարունակէ մնալ առաջնահերթ օրակարգ: Խորհրդարանը ապաքրտականացնելը կտրուկ միջամտութիւններով չի կատարուիր սակայն: Այլապէս, այսօր էրտողանական մենիշխանութիւնը կրնար արագօրէն յաջողցնել առաջադրանքը:

Հաշուի կ'առնուին բնականաբար եւրոպական արձագանգները՝ տրուած ըլլալով, որ ժողովրդավարական անուանումը ունի կուսակցութիւնը, նման քայլի դիմելու պարագային ուղղակի հակաժողովրդավար բնութագրումը եւ թրքական հայեցակէտէ՝ հաւանական շահարկումը արտաքին քաղաքական կեդրոններու կողմէ. կամ որքան ալ որ յայտարարողական մակարդակի վրայ լարուած պարանաձգութիւններու շրջանակին մէջ հնչեն իրար մեղադրող տեսակէտներ, այսուհանդերձ կամուրջները Եւրոպայի հետ կանգուն պահելու երկկողմանի մօտեցումները:



Միջնորդութիւնը կրնայ չբաւարարուիլ որոշ ատեն մը եւ հարցը շարունակէ դամոկլեան սուրի կարգավիճակով ճօճուիլ՝ իբրեւ քաղաքական սպառնալիք այս կուսակցութեան պետական գործիչներուն դէմ:

Ազգայնականներու, իսլամականներու ընտրաքաղաքական դաշինքը այսօր Թուրքիոյ խորհրդարանին մէջ ընդդիմադիր հաստուածի ըստ էութեան կայացման որեւէ իրական հիմք չէ ձգած: Հանրապետականներու երկրորդ կարգ մղուիլն ու Ժողովուրդներու ժողովրդավարական կուսակցութեան ցած համեմատութիւն ապահովելը միակուսակցականութեան եւ այդ դաշտին մէջ աւելի ճիշդը մենիշխանութեան թողած են ամբողջ երկրի կառավարումը: Դասական իմաստով ազգայնական զինուորականութեամբ յատկանշուած խորքային պետութիւնն ու երտողանականութիւնը այսօր նոյնացած են իրենց գաղափարախօսութեամբ եւ քաղաքական առաջադրանքներով:

Հաշուարկը սակայն, կտրուկ քայլերու չդիմելու եւ խորհրդարանէն անմիջապէս չարտաքսելու (որուն յաջորդ քայլը քրեական պատասխանատուութեան ենթարկելն է) քրտամէտ կուսակցութեան անդամները, որոշ չափով համընթաց է՝ զինուորական գետնի վրայ արձանագրուած թրքական ուշացող ներխուժումին սուրիական տարածքներ: Ներխուժում կը յայտարարուի, թրքական պաշտօնական լրահոսը ժամերու հարց կը նկատէ թրքական զօրքերու երեւումը Սուրիա, մինչ փոխան յայտարարուածին համաձայնեցուած սահմանափակ գործողութիւններ տեղի կ'ունենան թրքական ջոկատներու մասնակցութեամբ այդ տարածքներուն վրայ:

Քաղաքական իմաստով սպառնական միջնորդութիւններ, քննարկումներու յետաձգումներ, երբեմն առկախումներ: Փաստը այն է, որ ցարդ խորհրդարանի օրակարգ չէ եկած խորհրդարանական անձեռնմխելիութեան հարցը:

Զինուորական անկաշկանդ յառաջխաղացքի կասեցման եւ ուղղակիօրէն քիւրտերը չհարուածելու կարմիր լոյսեր վառուած էին Ուաշինկթընի կողմէ, որմէ ետք սկսած էր յետաձգուիլ եւ առկախուիլ Անգարայի առաջադրած անվտանգութեան գօտիի ստեղծումը եւ այդ գօտիի հարթեցման համար տարածքներու ամբողջական քրտազերծման զինուորական ծրագիրը:

Հիմա կը թուի, որ պիտի ձգձգուի նաեւ խորհրդարանի քրտազերծման այս առաջադրանքի կիրարկումը, հերթական խաղաթուղթի վերածելով քրտական գործօնը, որոշ պայմաններու մէջ զինուորական առումով, այլ պայմաններու՝ քաղաքական:

«Ա.»

## ԱՆԴՐԱԴԱՐՉ

# Թուրքիոյ Ազգային Մեծ Ժողովի Անդամ Կարօ Փայլանի Հրապարակային Բանախօսութիւնը Հայկազեան Համալսարանին Մէջ

Թուրքիոյ խորհրդարանի անդամ Կարօ Փայլան հրապարակային բանախօսութիւն մը տուաւ Հայկազեան համալսարանին մէջ, շաբաթ, 26 Յունուար 2019-ի երեկոյեան: Կարօ Փայլան Պէյրութ կը գտնուէր «Նոր սերունդ» մշակութային միութեան հրաւերով՝ «Ռետ» ժապաւենի ցուցադրութեան առիթով, որ տեղի ունեցաւ ուրբաթ, 25 Յունուարին, Սին Էլ Ֆիլի քաղաքապետարանի սրահին մէջ: Ժապաւենի բեմադրիչ եւ արտադրիչ Քատիր Աքըն նոյնպէս հրաւիրուած էր Պէյրութ: Ժապաւենը պատրաստուած է Աքընի աշխատասիրած «Փարամագ» գիրքին հիմամբ:

Հայ աւետարանական քոլեճի սրահին մէջ տեղի ունեցած այս բանախօսութեան ներկայ էր մեծաթիւ հանրութիւն մը, որոնք եկած էին լսելու Պէյրութի մէջ անոր առաջին հրապարակային ելոյթը: Անոնք յոտնկայս ծափահարութեամբ դիմաւորեցին երիտասարդ հիւրը:

Բացման խօսքին մէջ Հայկազեան համալսարանի Հայկական սփիւռքի ուսումնասիրութեան կեդրոնի տնօրէն դոկտ. Անդրանիկ Տազեսեանը բարիգալուստ մաղթեց մեծանուն հիւրին ու ներկաներուն եւ մատնանշեց, որ հակառակ այն իրողութեան, որ հայ ժողովուրդին ճակատագիրը մեծապէս ազդուած է եւ կ'ազդուի քաղաքականութենէն, Հայաստանի եւ Արցախի հանրապետութիւններէն դուրս ապրող եւ գործող արեւստավարժ հայ քաղաքական դէմքերու թիւը շատ փոքր է: Ան այդ փոքրաթիւ խումբին մէջ առանձնացուց Կարօ Փայլանը, որ իր գործունէութեամբ լայնօրէն ծանօթ է սփիւռքահայութեան: Ապա ան բեմ հրաւիրեց հիւր բանախօսը:

Իր խօսքին մէջ Կարօ Փայլան շեշտեց, որ ինք կու գայ հայոց պապենական հողերու երկրէն եւ հարցադրեց ներկայ ունկնդիրներուն մէջ այնթապցիներու, մարաշցիներու, աստանացիներու, պոլսեցիներու, մալաթիացիներու... գոյութիւնը: Ան յայտնեց, որ լաւ լուրեր չունի Թուրքիայէն ու ծանրացաւ Թուրքիոյ վերջին տարիներու ներքին քաղաքական կացութեան վրայ՝ շեշտը դնելով մարդկային իրաւանց, ազատութիւններու կաշկանդումներու, սեղմումներու, ժողովրդավարութեան խոչընդոտումներու վրայ:

Կարօ Փայլան պատմական համառօտ ակնարկով մը խօսեցաւ հայ-թուրք յարաբերութիւններուն մասին՝ սուլթան Համիտի օրերէն մինչեւ «Իթթիհատ վէ թերաքքը» եւ Հայոց ցեղասպանութիւն:

Ան վերլուծական օրինակներով բացատրեց եւ ընդգծեց, որ օսմանեան Թուրքիոյ աշխարհագրա-քաղաքական դիրքը պատճառ դարձաւ, որ շրջանային թէ մեծ պետութիւններ ջանան սիրաշահիլ ու իրենց կողմը քաշել Թուրքիան: Փայլան շեշտեց, որ սիրաշահելու այս քաղաքականութիւնը շեշտուած է 19-րդ դարու երրորդ քառորդէն սկսեալ, որմէ մեծապէս օգտուած են օսմանեան Թուրքիոյ իշխանութիւնները՝ ի հեճուկս երկրի փոքրամասնութիւններուն, արդարութեան եւ մարդկային իրաւունքներուն: Ապա Հայոց

ցեղասպանության տարիներին անցնելով ժամանակակից Թուրքիոյ՝ ան ընդգծեց, որ նոյն այս քաղաքական հնարաւորութիւններէն կ'օգտուի Թուրքիոյ Հանրապետութեան ներկայ նախագահ Ռեճեպ Թայիփ Էրտողանը, եւ մտահոգութիւն յայտնեց, որ անոր այս ընթացքին իբրեւ հետեւանք՝ լուրջ վտանգներ կը սպառնան երկրի

ժողովրդավարութեան, փոքրամասնութեանց, ազատութիւններուն, արդարութեան, մարդկային իրաւանց, հարեւան երկիրներու հետ Թուրքիոյ յարաբերութիւններու ոչ բնականոն զարգացման... Ան շեշտեց, որ ընդդիմադիր կուսակցութիւններէն Ժողովուրդներու ժողովրդավար կուսակցութեան (Հալք տեմոքրասի փարթիսի, HDP) 5000 անդամներ ձերբակալուած են եւ արգելափակուած կը մնան Թուրքիոյ բանտերու մէջ:

Բանախօսութեան աւարտին ուղղուեցան բազմաթիւ գրաւոր հարցումներ, որոնք կը վերաբերէին՝ հայ-թրքական փրոթոզոլներուն եւ հայ-թրքական յարաբերութեանց, իր անձնական ապահովութեան, Թուրքիոյ ցեղային եւ գաղափարախօսական փոքրամասնութեանց գործակցութեան, Թուրքիոյ արգելափակեալ այլախոհներու ճակատագրին, քիւրտերն ալ Հայոց ցեղասպանական ճակատագրին արժանացնելու հնարաւորութեանց եւ այլն, որոնց յարգելի բանախօսը մանրամասնօրէն պատասխանեց յստակ, թափանցիկ եւ բացորոշ բանաձեւումներով, ջերմ մթնոլորտի մէջ:

Հանդիսութեան փակումը կատարեց Հայկազեան համալսարանի նախագահ վեր. դոկտ. Փոլ Հայտոսթեանը, որ հաստատեց, թէ Կարօ Փայլան «խորհրդանիշը կը հանդիսանայ աւելին, քան հարիւրամեակի հայոց պատմութեան ծանրութեան, նաեւ՝ աշխարհագրութեան, նահատակութեան, գոյատեւումի եւ արդարութեան: Այս բոլորը շատ ծանր բեռ է: Տակաւին, ան կը հանդիսանայ խղճին ձայնը»: Վեր. Հայտոսթեանը հաւաստեց, որ՝ «Բազմաթիւ հայեր Կարօ Փայլանին մէջ կը գտնեն իրենց չխօսուող Դատին ձայնը», նաեւ՝ աւելի քան հայկական պատումը, որմէ ան առաւել կը ծանրաբեռնուի, «քանի պատմութեան եւ արդարութեան բոլոր հարցերը իրարու հանգուցուած են, մինչ մեր ժողովուրդը համբերատար է եւ ունի գոյատեւող յիշողութիւն»:

Վեր. Հայտոսթեանը եզրափակեց իր խօսքը՝ շեշտելով. «Դուն նաեւ մանկավարժ ես, բայց քու դասարանդ այսօր աւանդական դասարանէն շատ հեռու է, իսկ քու յայտագիրդ՝ գիրքէն խորունկ... Բոլորս քեզի կ'ըսենք շնորհակալութիւն եւ կը մաղթենք, որ Աստուած քեզի հետ ըլլայ»:

Հանդիսութեան աւարտին, յարգելի հիւրը շրջեցաւ իրեն հետ հաղորդակցիլ եւ նկարուիլ ուզող հանդիսականներուն հետ՝ թէ՛ սրահին մէջ եւ թէ՛ դուրսը՝ բակին մէջ:

Նախապէս, յարգարժան հիւրը, բանախօսութենէն առաջ հանդիպում մը ունեցած էր վեր. Հայտոսթեանին հետ, շրջագայած էր Հայկազեան համալսարանին մէջ, ծանօթացած՝ համալսարանի գործունէութեան եւ հանդիպում ունեցած՝ լիբանանահայ մամուլի ներկայացուցիչներու հետ:

*ԼՈՒՐԵՐ ԳԱՂՈՒԹՆԵՐԷՆ*

**Առաջնորդ Մուշեղ Արք. Մարտիրոսեանը Ընդունեց  
Լիբանանի Թեմի Ազգային Վարչութեան Ատենապետին  
Այցելութիւնը**



11 Յունուարին Արեւմտեան թեմի առաջնորդ Մուշեղ արք. Մարտիրոսեանը Ազգային առաջնորդարանի իր գրասենեակին մէջ ընդունեց Լիբանանի թեմի Ազգային վարչութեան ատենապետ Բաֆֆի Սիպեանի այցելութիւնը:

Հանդիպումին ներկայ եղան Ազգային կեդրոնական վարչութեան անդամ Կայծակ Զէյթեանը եւ Արեւմտեան թեմի Ազգային վարչութեան ատենապետ Կարօ Էշկիեանը:

Այցելութիւնը առիթ եղաւ խորհրդակցելու միջթեմական գործակցութեան շուրջ: Առաջնորդ սրբազանը եւ Սիպեանը ընդհանուր գիծերու մէջ տեղեկութիւններ հաղորդեցին Ազգային առաջնորդարանի հովանիին տակ գործող եկեղեցիներու, ազգային վարժարաններու եւ յարակից միաւորներու աշխատանքի դաշտերուն, ինչպէս նաեւ գաղութի հայկական միաւորներուն հետ գործակցական յարաբերութեանց մասին՝ միաժամանակ որոշ ծանօթութիւն տալով յառաջիկայ ծրագիրներու մասին:

Սիպեանը խօսեցաւ նաեւ Լիբանանի թեմին դիմագրաւած հարցերուն ու մարտահրաւերներուն մասին:

Նկատուեցաւ, որ սփիւռքեան պայմաններուն մէջ կան հասարակաց հարցեր ու մարտահրաւերներ, որոնք կը կարօտին համագործակցութեան ու համատեղ աշխատանքի:

## **Հայոց Ցեղասպանութեան Նուիրուած Յուշարձան՝ Քալամաթայի Մէջ**

Քալամաթայի քաղաքապետական խորհուրդը իր նիստի ընթացքին որոշեց Հայոց ցեղասպանութեան նուիրուած յուշարձան մը կանգնեցնել իր քաղաքին մէջ:

Քալամաթայի քաղաքապետ Փանաեռթիս Նիքաս քաղաքի հայ համայնքի ներկայացուցիչներու ներկայութեան յայտարարեց, որ յուշարձանը Հայաստանէն պիտի բերուի ու պիտի գետեղուի ,Սուրբ Նիկողայոսե եկեղեցոյ դիմացի պուրակին մէջ: Յիշեցնենք, որ եկեղեցին քաղաքի յոյն ուղղափառ առաջնորդին կողմէ յատկացուած է հայ համայնքին՝ եկեղեցական արարողութիւններ կատարելու համար:



Քաղաքապետը աւելցուց, որ յուշարձանի կանգնեցման այս որոշումը տրուած է՝ նկատի ունենալով, որ Քալամաթայի մէջ հայ համայնքը տարիներու ընթացքին աշխուժ ներկայութիւն եղած է:

## **ՀՅԴ «Մ. Փափագեան» Կոմիտէի «Արմէն Կարօ Եւ Շաքէ Կէօնճեան» Կեդրոնի Բացում**

Հովանաւորութեամբ Քանատայի հայոց թեմի առաջնորդ Բաբգէն արք. Չարեանի, 18 Յունուարին տեղի ունեցաւ ՀՅԴ ,Մ. Փափագեանե կոմիտէի ,Արմէն Կարօ Եւ Շաքէ Կէօնճեանե կեդրոնին բացումը՝ ներկայութեամբ կեդրոնի բարերարներ Շաքէ, Նորա Եւ. Զաւէն Կէօնճեաններուն: Օրուան հանդիսավար Գեորգ Գազանճեանը ամփոփ կէտերու մէջ ներկայացուց կեդրոնի վերանորոգման ծրագրի իրականացման պատմականը՝ շնորհակալութիւն յայտնելով Կէօնճեան ընտանիքին, որոնց շնորհիւ իրականացաւ երկարամեայ երազ մը: Կալուածը վերածել այն վայրին, որ պիտի ծառայէ Մոնրէալի Հայ կեդրոնին յարկին տակ գործող բոլոր ուղեկից կազմակերպութիւններուն: ՀՕՄ-ի ,Սօսէե մասնաճիւղի աստենապետ Հուրի Զաքարեանը յայտնեց, որ սոյն ծրագրին իրագործման հիմնական դրդապատճառները հանդիսացան հայ համայնքի թիւի աճը եւ ՀՕՄ-ի գործունէութեան ընդլայնումը՝ բարձր գնահատելով Կէօնճեան ընտանիքին ազգանուէր կեցուածքը:

Համազգայինի ,Սանահինե մասնաճիւղի աստենապետ Թամար Փոլատեանը յայտնեց, որ սոյն պատմական օրը մասնաճիւղին համար տօն է, որովհետեւ կ'իրականանայ միութեան տարիներու երազանքը՝ մշակութային կեդրոնի մը ստեղծումը:



Այնուհետև խօսք առաւ Շաքէ Կէօնճեանը, որ յիշատակումը կատարեց իր մեծ ծնողներուն, որոնք Եգիպտոսի մէջ սիւները եղած են Համազգային մշակութային միութեան, Հայ կարմիր խաչի, Կամքե-ին եւ Յառաջդիմասէրե-ին: Ան մաղթեց, որ սոյն կեդրոնը լիիրաւ կերպով ծառայէ հայ մշակոյթին, հայ լեզուի պահպանման, ընկերային ծառայութեան, հայ պատանիին ու երիտասարդին հայաշունչ դաստիարակութեան ու յաջողութիւն մաղթեց բոլորին՝ յատուկ շնորհակալութիւն յայտնելով բոլոր անոնց,



որոնք յամառօրէն եւ առանց յուսահատելու աշխատեցան ու իրականացուցին այս ծրագիրը:

ՀՅԴ Միհրան Փափազեանէ կոմիտէի անունով Սագօ Նոյսուտեանը շնորհակալութիւն յայտնեց բոլոր անոնց, որոնք սատարեցին սոյն ծրագրի իրագործման: Ան նշեց, որ նոյն օրը կը զուգադիպի ՀՅԴ-ի հիմնադիր երրորդութենէն Ստեփան Զօրեանի (Ռոստոմ) մահուան 100-ամեակին ու ընդգծեց անոր անձայն աշխատողի բնաւորութեան տէր ըլլալու յատկանիշը, հաստատելով, որ Ռոստոմի օրինակին հետեւելով՝ երթը պիտի շարունակուի վճռակամօրէն՝ միշտ նպատակ ունենալով հայապահպանում, անշահախնդիր, անսակարկ աշխատանք ու Հայ դատի արդար լուծում:

Աւարտին շնորհաւորական եւ գնահատական խօսքով ելոյթ ունեցաւ սրբազան հայրը:

**WWW.AZTAGDAILY.COM**



AMERICAN PRIVATE SCHOOL  
*Private*

## ԱՆԳԼԵՐԵՆԻ

### ԴԱՍՆՆԹԱՅՔ

Սիրով կը տեղեկացնենք, որ Քուէյթի Ազգային Վարժարանը կազմակերպած է Անգլերէնի դասընթացը (18 տարիքը ամբողջացուցած բոլոր հայորդիներուն), զլիստորութեամբ վարժարանիս անգլերէնի դասատու՝

#### *Օրդ. Գոհարիկ Արզարեանի*

Դասընթացը տեղի պիտի ունենայ Ազգային Վարժարանէն ներս, երկու ամսուան տեսողութեամբ (Փետրուար-Մարտ 2019), շաբաթական երկու օրերու ընթացքին, երեկոյեան ժամը 8:00ին:

Ցաւելեալ մանրամասնութիւններու համար դիմել հետեւեալ հեռախօսահամարին 51781231:



## Let's Speak English! Evening Classes For Adults

- English Fluency
- Confidence Building
- Public Speaking
- Presentation Skills
- Conversation Skills

**Instructor Ms. Kohar Apkarian**

**For beginners; basic English is required.**

PosterMyWall.com

For more info contact 65681575

ԱՅԼԱՉԱՆ

## Պէ՛ տք է Լուալ Նոր Գնուած Հագուստը

Նոր գնուած հագուստը նախքան հագնիլը արդէօք պէ՛ տք է զայն լուալ:



Մասնագէտներու կարծիքով, հագուստ մը պէտք է անպայման լուալ նախքան կրելը, յատկապէս՝ առանձնացնելով այն հագուստը, որ ուղղակի մարմնին կը դպչի:

Նոյնիսկ եթէ հագուստը չէ փորձուած նախքան գնելը, միեւնոյնն է, անհրաժեշտ է զայն անպայման լուալ, քանի որ գրեթէ բոլոր մանուածքները կամ ներկուած հիւսուածքները քիմիական նիւթեր կը պարունակեն: Իսկ այդ նիւթերը կրնան մորթի գերզգայնութիւններ պատճառել:

Նիւ Եորքի Քոլիւմպիա համալսարանի բժշկական կեդրոնի մաշկաբան Տոնալտ Պելսթընը «Տը Ուոլ Սթրիթ Ճըռնըլ»-ին յայտնած է, որ հագուստ մը տարբեր մարդոց կողմէ փորձուելով՝ կրնայ վարակիչ հիւանդութիւններ փոխանցել: Հետեւաբար պարտադիր է, որ բոլոր տեսակի հագուստները, բայց մանաւանդ ներքնազգեստները լուացուին նախքան կրելը:

### Իմաստուն Մը Ըսած Է...

**3 բան երբեք չեն վերադառնար՝**  
Ժամանակը, խօսքը, հնարաւորութիւնը:

**3 բան պէտք չէ կորսնցնել՝**  
հանգստութիւնը, յոյսը, պատիւը:

**3 բան կեանքի մէջ շատ թանկ են՝**  
սէրը, յարգանքը, ընկերութիւնը:

**3 բան կեանքի մէջ անկայուն են՝**  
իշխանութիւնը, յաջողութիւնը, կարողութիւնը:

**3 բան կեանքի մէջ կը բնորոշեն մարդը՝**  
աշխատանքը, ազնուութիւնը, ձեռքբերումները:

**3 բան կը կործանեն մարդը՝**  
գինին, գոռոգութիւնը, չարութիւնը:

**3 բան ամենադժուարն է ըսել՝**  
քեզ կը սիրեմ, ներէ, օգնէ ինձի:

# www.kantsasar.com